

## LITTERATURA

# Il «Grand Prix» da litteratura va en il Grischun


Il Grond premi da litteratura svizzer survegn quest onn il Grischun Reto Häny. El vegn onurà per si'ovra cumpletta e ludà per sia forza linguistica en quell'ovra.

Il pli nov cudesch, cun il num «Sturz», ha l'autur grischun *Reto Häny*, publitgà l'onn 2020. Ins na possia bunamain betg serrar quest cudesch, ins stoppia adina puspè cumenzar a legger da nov, hai num en la laudatio.

### Il pli aut premi litterar da la Svizra

Il Grond premi da litteratura – il «Grand Prix» – è il pli aut premi litterar da la Svizra ed è dotà cun 40 000 francs. El vegn surdà da l'Uffizi federal da cultura. La surdada uffiziala è ils 25 da matg 2022 a chaschun da la preavertura dals Dis da litteratura da Soloturn. Sper il Grond premi vegnan er surdads ils premis spezial mintgamai in onn per «translaziun» ed in onn per «intermediaziun». Er quests premis èn dotads cun 40 000 francs. Quest onn va il premi «translaziun» a l'autura tessinaisa *Maurizia Balmelli*. Ella ha traslatà en talian ovras enconuscentas tranter auter dad Ágota Kristóf, J.M.G. Le Clézio, Ian McEwan u Yasmina Reza.

Plinavant vegnan er onurads ed onurads da l'Uffizi federal da cultura mintg'onn divers au-



L'autur grischun, Reto Häny.

FOTO DAVIDE CAENARO

turs ed auturas per lur pli novas ovras (cumparidas 2020). Quels premis èn dotads cun 25 000 francs ed ils auturs e las auturas survegnan ulteriur sustegn per far pli enconuscentas lur ovras – tranter auter als Dis da litteratura a Soloturn. In tal premi han era gia survegnì auturas ed auturs rumantschs, sco p.ex. Flurina Badel (2020), Dumenic Andry (2018) e Leta Semadeni (2016).

### Tschappina – Cuira – Turitg

L'autur Reto Häny è naschi il 1947 a Tschappina. El scriva davart sia uffanza en ils culms grischuns, ses onns giuvs en il conturn da Cuira sco er davart las revoltas dals onns 1980 a Turitg. En ses texts n'elavura el betg ils schabets a moda cronologica, mabain en furma da regurdientschas, siemis, associaziuns u er invenziuns. El è vegnì enconuscent tranter auter per cudeschs sco «Flug» (1985), «Sturz» (2020) u «Blooms Schatten» (2014). Reto Häny è gia vegnì onurà cun divers premis sco p. ex. il premi Ingeborg Bachmann u il premi da cultura Zollikon. (cdm/rtr/fmr)